

Prome Minister Mike Eman a comparti proyecto di restauracion di school JFK cu famia Kennedy

By Redaccion 36 - July 2, 2012

- Advertisement -



Plan ta inclui un edificio nobo pa e JFK auditorio pa comunidad



MASSACHUSETTS/ORANJESTAD – Prome Minister di Aruba Mike Eman a bishita famia Kennedy y a comparti cu nan e plannan pa restaura John F. Kennedy School.

Joseph P. Kennedy (Joe) y su señora Beth tabata conmovi cu e plannan pa restaura e school y converti'e den un lugar prominente na Aruba. Joseph Kennedy, e di dos di e diesun yiunan di Robert Kennedy kende tabata un Congresista den Senado Mericano hunto cu su señora a yega di bishita Aruba riba invitacion di Prome Minister Eman y tin masha grato recuerdo di e bishita ey.

Famia Kennedy tabata masha contento di tende di tur e desaroyonan positivo cu ta tumando luga riba e isla y ta ansioso pa bin Aruba back pa e inauguracion di JFK school ora esaki ta restaura.

Joe Kennedy a keda masha impresiona cu e proyecto 'renobacion urbano' di Aruba y e efectonan positivo cu esaki tin riba economia di e isla. Interesante el a haya tambe e exito cu Aruba tin den mantene un rating di credito halto den un tempo cu hopi pais na mundo ta worde degrada den nan evaluacion.

Como director di un compania importante di energia na Boston, Joe Kennedy a expresa gran interes den e esfuersonan cu Aruba ta haciendo pa bay den direccion di energia renobabel. Kennedy ta e Fundado, Chairman y Presidente di e 'Citizens Energy Corporation', un corporacion non-profit hopi conoci cu ta dedica na entrega petroleo pa keinta cas na famianan di menos recurso y cu tin tambe programanan innovativo pa yuda e pobernan.

Prome Minister Eman a entrega famia Kennedy un potret na unda por mira señora Ethel Kennedy, viuda di Robert Kennedy, ta haya un replica di e simbolico mata di Divi Divi aña pasa for di Eman.

Prome Minister a regala señora Kennedy e mata aki den reconocimiento di e palabranan inspirativo di Robert Kennedy kende a bisa pa respeta naturalesa y pa enfoca mas den esaki cu solamente wak cifranan manera p.e. di GDP, pa asina no faya den midi e cosnan cu ta mas importante den bida.

Joe Kennedy na su turno a regala Prome Minister Eman un potret di un poster di campaña di su tata Robert Kennedy ora cu e tabatin un encuentro cu mineronan di carbon durante su campaña pa bira Presidente Mericano na 1968. Riba e poster ta skirbi "It is OK to care" den reconocimiento pa e empatia pa esnan cu tin trabaonan dificil y esnan menos afortuna.

Tanto Mike Eman como Joe Kennedy ta miembro di e di cuatro generacion di nan famia cu a scoge pa dedica nan mes na sirbi e pueblo pa interes general di amistad comparti, pero naturalmente tambe pa refleha riba e retonan pa enfrenta mundo y nan idealnan comparti pa humanidad y pa mehora e calidad di bida di nan pueblonan.

- Advertisement -



Redaccion 36
